

INUIT ATAQATIGIIT

INATSISARTUNI



UPA 2014/132.1

26. marts 2014

Naaja H. Nathanielsen

**Uunga siunnersuut: Aatsitassat pillugit ingerlatallu tamatumunnga pingaarutillit
pillugit Inatsisartut inatsisaat nr. 7, 7. december 2009-meersup allanngortinnis-
saa pillugu Inatsisartut inatsisaat nr. xx, xx. xxxx-imeersoq (aatsitassanut
inatsit)**

(Inuussutissarsiornermut Aatsitassaqarnermullu Naalakkersuisoq)

Tusarniuteqartitsisarnerit allaatigineqarluarnerusariaqarnerat pillugu Naalakkersuisut Inuit Ataqatigiit tungaannit isumaqtigaagut, taamaattoq isumaqarpugut inatsisisstatut siunnersuut akuerineqartinnagu annertuunik allanngutteqartoqartariaqartoq. Tamanna pillugu siunnersuut xxx-mut ataatsimiitaliamut suliarisassanngortillugu innersuutigaarput.

Siullermik isumalioqqutigineqartariaqarpoq tusarniaanerit innuttaasunillu peqataatitsinerit pillugit immikkullarissumik inatsiseqartoqartariaqannginnersoq. Tamatuma aatsitassarsiornermut suliassaqarfimmut tunngatillugu eqqartorneqarnissaa naammanngilaq, suli-niutinut angisuunut allanut inuiaqtigiainnik avatangiisinillu sunniisussanut aammattaaq tunngatinneqartariaqarpoq. Ataatsimiitaliaq qinnuigissavarput tamanna isumalioqqutigeqquillugu.

Innuttaasunik peqataatitsisarnerit tusarniuteqartitsisarnerillu ullumikkornit aallartiaartin-neqartarnissaat pillugu Naalakkersuisut Inuit Ataqatigiit tungaannit isumaqtigaagut. Illassilluarparput tamanna.

Siusinnerusukkut Kommissionen for Videnskabelige Undersøgelser i Grønland (KVUG) tusarniuteqartitsisarnerni ilanngutitinneqartarnikuovoq. KVUG maanna atorunnaarsimalerpoq aalajangersagarlu tassunga tunngasoq inatsimmit peerneqartariaqarluni. Tassunga atatillugu Inuit Ataqatigiit tungaannit siunnersuutigeqqissavarput tassunga taarsiullugu aatsitassarsiornermi suliniutit ataasiakkaat pillugit Naalakkersuisunut siunnersuisartussanik arlaannaannulluunniit attuumassuteqanngitsunik siunnersuisoqatigienik pilersitsisoqassasoq. Uagut paasinninnerput malillugu taama ittumik peqalernissaq erseqqissumik pisariaqartinneqarpooq.

Tusarniaanermut piffissaliunneqartoq sapaatit akunnerinik arfineq pingasunik sivisussuseqassasoq Naalakkersuisut kissaatigaat. Danmarkimi aamma taamatut periuseqartqarnera arlalitsigut innersuutigineqarpoq. Inuit Ataqatigiit isumaqarpugut taamatut sa-nilliussineq tulluanngitsoq. Assersuutigalugu Danmarkimi pisortat ingerlatsineranni oqaatsit ataatsit taamaallaat atorneqartarpus nutserineq piffissaajaatigineqartariaqartaran. Taamaammat tusarniaanermut piffissaliunneqartup sapaatit akunnerinut qulinut imaluunniit aqqaneq marlunnut sivitsortinneqarnissaa Inuit Ataqatigiinnit isumalioqqutigillaquarput. Tusarniaassutigineqartut ullormiit kalaallisut saq-qummersinnejarfiat nalerorlugu tusarniaanermut piffissaliunneqartup aatsaat aallartinneqartutut naatsorsuunneqartalernissaa inatsimmi erseqqissarnejqassasoq aamma kissati-gaaput. Taamatut piumasaqarnermut pissutaavoq misilitakkat takutimmassuk danskisut saqqummersitat taavalu kalaallisut saqqummersitat tamatigoqqissaaq ataatsikkut pi-areertinneqarneq ajormata – tusarniaanermut piffissaliunneqartup sivitsorneqarneranik nassataqarneq ajortumik. Isumaqarpugut tamanna ajortoq.

Alla taasarialik pingaaruteqartoq inatsimmi qaquinneqanngitsoq tassaavoq tusarniaanermut akissuteqaatit sumorpiaq atorneqartarnerannut tunngasoq. Massa atorfissaqartivinvikkaluarlugu tusarniuteqartitsisoqarluarsinnaasarloq. Assersuutigalugu taama pisoqarpoq aatsitassarsiornermut periusissiamut tunngatillugu, taamanikkut tusarniaanermut piffissaliunneqartoq februarip ulluisa arfineq aappaannut killeqarpoq aqaguanilu februarip ulluisa arfineq pingajuanni inaarutaasumik ilusia nassiunneqarluni. Tusarniaanermut akis-suteqaatit eqqarsaatiginissaannut taamatut piffissaqangaartoqarsinnaasanngilaq. Inuit Ataqatigiinni neriuuppugut ataatsimiititaliap tamanna eqqarsaatigiumaaraa isumaliutissiis-summilu sammillugu.

Ullutsinni tusarniaasarnerit innuttaasunillu peqataatitsisarnerit ileqqusut malittorujusuul-lugit ingerlasarput. Inuit Ataqatigiinni isumaqarpugut innuttaasunik peqataatitsinermut periutsit arlaqarnerusut ineriartortittariaqarivut aammalu ilisimasaqarfiginerusaria-qaripput inuit qanoq iliornikkut eqqartueqataallualersissinnaanerigut. Ullumikkut inuit tusaaneqarnerusartut tassaagajunnerusarput inuit unnukkut ataatsimiigiarnissamut pif-fissaqarlillu periarfissaqartartut aammalu inuit amerlasuut saavanni nikuinnissamut oqaaseqarnissamullu ittoorneq ajortut. Inuit Ataqatigiit isumaqarpugut innuttaasut akornanni inoqartoq peqataanissamut akornguteqartunik. Assersuutitut taasinnaavagut utoq-qaat pitsorilluarunnaarnikut imaluunniit angajoqqaat meeraatillit taamatut ataatsimiit-tisarnerit nalaanni allarpasuarnik ulapputeqartartut. Isumaqarpugut peqataatitsinermut periutsit nutaat nassaarineqarnerisigut innuttaasut amerlanerusut eqqartueqataalersis-sinnaanngussagigut.

Aningaasaateqarfiliassatut siunnersuutigineqartoq Inuit Ataqatigiinni paasisaqarneruffigerusupparput. Aningaasanut inatsit pillugu isumaqatiginninniarernut atatillugu qaam-marsaanermut aningaasaateqarfiliortoqarpoq naalakkersuisutigoortuunngitsumik sulinia-

qatigiiffit tusagassiuutillu qinnuteqartarfigisinnaasaannik. Paaserusupparput aningaasaa-teqarfik sorleq pineqarnersoq, taanna pilersinneqartoq imaluunniit alla pineqarnersoq? Inuit Ataqatigiit tungaannit kaammattutigissavarput taamaallaat ataatsimik aningaasaa-teqarfeqassasoq qaammarsaanermut paasisassarsiornermullu atugassanik tapiissutinik agguasinnasaartumik.

Tusarniaaffit arlaqartut taavaat tusarniaassutigineqartut suulluunniit soqutiginaatillit tusarniaanermut piffissaliunneqartup iluani saqqummersinneqartariaqaraluartut. Naalakkersuisut isumaqarput taamaasiussagaanni tamanna paatsiveerussaataaginnassasoq isumaqarlutillu paasisutissat pingaarutillit sorparpassuit akornanni tamakku arajutsiinnarneqaratarsinnaalissasut. Naalakkersuisut taama isummernerat Inuit Ataqatigiit paasisinnaanganilarput. Atuartussanut ilitsersuusiornikkut tamanna Naalakkersuisut aaqqeriaannaagaluarpaat tusarniaassutigineqartullu akornanni atuagassat sorliit isumartik malillugu pingaartinneqarnerusariaqarnersut erseqqissaavigalugit. Isumarpulli malillugu Naalakkersuisut aalajangigassarinngilaat tusarniaassutigineqartut sorliit innuttaasut atuarsinnaasaneraat. Suulluunniit ammasumik takuneqarsinnaasariaqarput, aamma innuttaasut, inuussutissarsiortut kattuffiillu paasisutissanik qanoq ittunik pisariaqartitsinermennik namminneerlutik naliliisinnaanerat Naalakkersuisut tatigisariaqarpaat. Tupinnarpoq inatsimmi innuttaasunik peqataatitsinermut tunngasumi tusarniaassutigineqartut aalajangersimasut saqqummiunneqartannginnissaat Naalakkersuisut tunngavilersorniarsarimmasuk.

Kiisalu tamanut ammasumik tusarniaalluni ataatsimiitsisarnerit torersumik ingerlanne-qartarsinnaassanngippata tusarniaanermut piffissaliunneqartup sivitsortinneqartariaqaraneranik tusarniaaffit taakkartuinerat Inuit Ataqatigiit tungaannit isumaqataaffigivarput. Naalakkersuisut kissaateqarput tamanna piumasarineqartassanngitsoq. Uagulli isumaqarpugut tamanna piumasarineqartassasoq.

Oqaatigineqartutut aappassaaneerneqartinnagu ataatsimiitaliamut suliarisassanngortil-lugu siunnersuut innersuutigaarput.